



**Uorden disciplinar
per la scola dalla vischnaunca Tujetsch**



Approbaus entras il cussegl da scola ils 30 d'october 2014

Cuntegn

I. Disposiziuns generalas	3
II. Disciplina en scola	3
III. Castitgs disciplinars, cumpetenzas, procedura.....	4
IV. Disposiziuns finalas.....	5

Uorden disciplinar

Sebasond sin art. 55 dalla lescha da scola cantunala dils 02-03-2012, sin art. 54 dall'ordinaziun tier la lescha da scola cantunala sco era sin art. 12^{2,13} digl uorden da scola dalla vischnaunca Tujetsch, relai il cussegl da scola il suandont uorden disciplinar.

I. Disposiziuns generalas

Art. 1

Ensemen cugl uorden da scola gida igl uorden disciplinar da contonscher in menaschi da scola che lubescha da luvrar, scolar e sescolar a moda efficienta ed emperneivla.

Intent

Art. 2

Igl uorden disciplinar vala per tut las scolaras e tut ils scolars dalla scola dalla vischnaunca Tujetsch.

Valeivladad

II. Disciplina en scola

Art. 3

¹ Ils scolars han da secuntener vicendeivlamein a moda discreta e toleranta e tralasar remarcas offendentas. Ils scolars sedeportan andantamein denter els, enviars persunas d'instrucziun, autoritads da scola e personal da scola.

Reglas da secuntener

² Las directivas dallas persunas d'instrucziun, dallas autoritads da scola, dil personal da scola e dils manischunzs dil bus da scola ein d'observar.

³ Ils scolars eviteschan tut quei che disturba il menaschi da scola.

⁴ Senza lubientscha d'ina persuna d'instrucziun eis ei buca lubiu als scolars da bandunar il plaz scola durant il temps da scola.

⁵ Ils temps da scola ein d'observar strictamein.

Art. 4

¹ Ils scolars han quitaun dils indrezs e dallas localitads sigl areal da scola sco era dils urdeins, dil material da scola e dils mieds da transport. Donn caschunai cun cuolpa dils affons ston vegnir indemnisai dils geniturs.

Localitads, indrezs, urdeins

² Igl uorden da casa ei d'observar.

Art. 5

¹ Fimar e consumar ni posseder bubrondas alcoholicas e drogas ei strictamein scumandau sigl areal da scola sco era durant occurrenzas da scola.

Mieds nuscheivels

Art. 6

Sigl areal da scola ed a caschun d'occurrenz da scola vegn tolerau negina violenza, ni fisica ni psichica.

Violenza

Art. 7

Per il viadi a scola han ils geniturs (ni la persuna responsabla per l'educaziun) la responsabladad e l'obligaziun da survegionza. L'excepziun ein ils transports organisai dalla scola.

Viadi a scola

III. Castitgs disciplinars, cumpetenzas, procedura

Art. 8

¹Surpassaments digl uorden disciplinar vegnan puni cun admoniziuns, lavurs da castitg, arrests ni lavurs specialas sut survegionza.

Castitgs disciplinars

²Duront igl arrest e la lavur speciala stattan ils scolars sut survegionza. Il cuoz maximal per ils arrests e per las lavurs specialas munta a 4 mezs dis per cass.

³La persuna responsabla per l'educaziun ei d'infomar davart mintga mesira disciplinara entras l'istanza che decida.

Art. 9

¹La persuna d'instrucziun ed il menader da scola san ordinar admoniziuns en scret ni a bucca, lavurs da castitg ed arrests da tochen in miez di per cass.

Cumpetenzas

²Il cussegl da scola ha la cumpetenzza d'ordinar tut ils castitgs disciplinars pusseivels.

³En cass da grevs surpassaments disciplinars ni da tenutas repetidamein munglusas en scola sa il cussegl da scola sclauder scolars dalla scola tenor la lescha da scola cantunala (LS art. 55) respectiv tenor l'ordinaziun da scola cantunala (OS art. 54).

Art. 10

¹Gener e circumstanza dil surpassament disciplinar ein da sclarir. Il scolar ei da tedlar.

Constatar il causal, udida da dretg

²En cass ch'in arrest che survarga in miez di ni ina lavur speciala sut survegionza stattan en damonda, eis ei da tedlar ils geniturs respectiv lur representants avon che prender ina decisiun. La decisiun ei da comunicar ad els a scret cun aschuntar ils motivs.

Art. 11

¹Encunter decisiuns da castitgs disciplinars entras la persuna d'instrucziun ni entras il menader da scola sa vegnir fatg recuors tier il cussegl da scola enteifer 10 dis suenter la comunicaziun (art. 14 digl uorden da scola).

Recuors

²Sebasond sin la lescha cantunala da scola san persunas directamein pertuccadas recuorer enteifer 10 dis tier il departament d'educaziun, cultura ed ambient encunter decisiuns pridas entras il cussegl da scola.

IV. Disposiziuns finalas

Art. 12

Davart cass disciplinars informeschan las persunas d'instrucziun, il menader da scola e las autoritads responsablas ina l'autra commensuradamein cun risguardar l'obligaziun da discreziun.

Informaziun

Art. 13

Las persunas d'instrucziun, il menader da scola ed il cussegl da scola ein mintgamai responsabels per l'execuziun dils castitgs ch'els han ordinau. L'execuziun sa era vegnir delegada a persunas d'instrucziun ed ad autras persunas ni instanzas.

Execuziun

Art. 14

Quei uorden disciplinar entra en vigur retroactiv cun l'entschatta digl onn da scola 2014/2015. El remplazza tut ils uordens disciplinars valeivels tochen uss.

Vigur

Approbau entras il cussegl da scola ils 30 d'october 2014.

Il president:
Primus Deragisch

La meinascola:
Manuela Schnoz